

# 1 Timothy

*Bu Paul Bimarnebimbom Nawu Timothy  
1 Timothy 1:1-2*

<sup>1-2</sup> Ngaye Paul ngabimbom nahni djurra ngudda ke Timothy. Ngudda yiwoybukwong Jesus, dja kunmekbekenh ngudda yiyimerranj ngardduk beywurd! God nawu kannganhkeng rowk dja mak Christ Jesus nawu karrimadbun, bedda wanjh ngandiwokrayekwong dja ngaye kunu ngayimerranj apostle nuye Christ Jesus.

Wanjh ngaye ngadjare God nawu Kornkumo dja mak Christ Jesus nawu kawohrnan kadberre bu ngundimarnekurduyime kunmak bu djal burudjang, dja mak ngundikongibun dja mak ngundiwon kunmodmikenh.

*Yibenbengdayhkemen Bininj Nawu Kunbuyika  
Kabindibukkabukkan  
1 Timothy 1:3-7*

<sup>3</sup> Bu ngaye ngabalhrey kore kubolkimuk Macedonia, wanjh ngaye ngokko marneyimeng mandjad ngudda kunmekbe yidjalnin kore kunred Ephesus. Bolkkime ngaye wanjh yawohmarneyime yidjalnin kunmekbe dja yibenwokrayekwo dja yibenngurdkemen birrimekbe bininj nawu kabindibukkabukkan kore mankarrebuyika manbu kabenkebrokwarrewon bininj.

<sup>4</sup> Ngudda kab yibenmarneyimen bu birribawo manmekbe manbu mankarre manbu minj

kunwoybuk. Dja mak birribawo manbu kabirrikadjung nawu kore mawahmawah bedberre nawu naninjnanu kabirringeydingeydi, kornkorunkumokenh dja mawahmawahkenh dja mak nawu bindikebmawahmeng. Birribawo kumekbe kore kabirriburrbun. Bu kabirridjalburrbun manmekbe manu, wanjh kunu kabirridjaldangwerren. Dja kab wardi birridjalwoybukwo God ba bu kabirriburrbun kore nungka kadjare.

<sup>5</sup> Bu ngad ngarrbenbukkan bininj kore yiwarrudj, baleh kab karriburrbun kore ngarrbenmarnekurduyime bedberre? Wanjh ngarrbenmarnbun bu kabirrini yiman kabirrikangebele yerreh dja minj mak kunwarre kabirriyawoyhkurduyime. Bu kuhni wanjh kabirriwoybukwon God bu minj kabirrihkurren, wanjh kunukka kabirridjalmarnedjaremerren mandjad duninhj. <sup>6</sup> Yikahwi bininj wanjh birribawong kunmekbe rowk. Bedda birridurndi kore kabirridjalwokdi kunwarrekenh. <sup>7</sup> Bedda kabirridjare kabindibukkabukkan birribuyika bininj kore God nuye mankarre kahyo. Bedda wanjh kabirriyime bu bedda djal mandjad kabindibukkabukkan bininj, dja med, bedmandeleng minj kabirriwernhburrkburrkbekkan kore baleh yarrkka kabirriwokdi dja kabindimarneyolyolme.

*Njalekenh God Kanwong Kadberre Mankarre  
Nuye?*

*1 Timothy 1:8-11*

**8** Ngad karriburrbun bu manbu mankarre nuye God wanjh manmak, dja bininj birriwernhmarrkma kore mandjad duninjh. **9-10** Dja mak karriburrbun bu God kurrmeng mankarre nuye nawu bininj birriwarre bedberre, dja manu mankarre minj kabendjuhbun nawu birrimak bininj. Dja manbu mankarre kahyo bedberre birrimekbe bininj kore bedman munguyh kabirridjalkurduyime kunwarre. Ngaye ngabenhyolyolme bininj nawu kabirridjalwe dja kabirridjalbakke maninjmanu mankarre, dja mak nawu kabirrimarnewarnyak nawu God dja kabirridjalkurduyime kunwarre munguyh. Dja mak bininj nawu minj kabirrimarnekele God dja kabirridjalkewkme kore yiwarrudj. Bedda yikahwi nawu kabindihbun kabindihkukkurrme yiman kayime nawu nakornhkornkumo dja ngalbabajan bedberre dja mak bininj birriwern nawu namarndeyi kabirribebbehylimerran. Ngayime warridj bininj dja daluk nawu kabirridjirdmaren, dja mak bininj nawu kabindikukweykan birribuyika bininj kore kabindibongkarrmekenh kore kabindimarnedurrrkmirri bedberre. Wanjh nakka nanu bininj kabirridjalkurren dja mak nawu kabirrihwokkurrehkurren bu kabirrihre kore court.

Kaluk ngaye ngabenhyolyolme bininj nawu kandiyiwirrihme mankarre ngarrku munguyh kore ngarrbenbukkabukkan mankarre manbu manmak. **11** Dja kore kunmak duninjh ngarrbenbukkan kore djal kunmak kunwok kore manbu Godbeh, nawu ngad karridjalburlume rowk. Nungka nganwong ngaye bu kunwok

kunmak ngawoknahnan.

*Ngaye Ngamanjbun Christ Jesus Nawu Kawohrnan Kadberre  
1 Timothy 1:12-17*

<sup>12</sup> Ngaye munguyh ngahdjalmanjbun Christ Jesus nawu kawohrnan kadberre. Nungka wanjh ngaye nganmarnemakwam, nawu nungka nganmurrngrayekwong dja ngankurrmeng bu kuninkunu ngahmarnedurrkmirrikenh kore nungka nuye. <sup>13</sup> Bu korroko ngaye wanjh ngadjalwarreni duninjh, dja ngamarneyimi nuye kunwok kunwarre munguyh. Dja mak ngaye ngabenhbuni nawu bininj birrikodjkulumakni yiwarrudj bedberre bu djal kunrayek duninjh ngabenmarnekurduyimi. Kunukka kunu ngadjaldjareni. Wanjh nungka Christ Jesus ngandjalkongibom bulkidj duninjh. Kuhni bu minj ngaye ngawernhburrbuyi bu ngaye baleh ngahkurduyimi, dja ngaye minj ngawoybukwoyi nungka. <sup>14</sup> Dja nawu kawohrnan kadberre wanjh kundjalmak duninjh ngandjalmarnekurduyimeng. Nungka nganmarnbom bu ngaye nganebelbmerrinj Christ Jesus dja mak ngabenmarnedjareminj birribuyika bininj.

<sup>15</sup> Wanjh ngadjare kanbekka! Ngudda wanjh yidjalwoybukwo bu kuhni woybukkih duninjh Christ Jesus kumwam kondanjkunu kurorre ba bu kanngehke ngad nawu karriwarre bininj. Ngaye wanjh nawu ngahdjalwernhwarreni duninjh bu ngabenyurhkeng birribuyika birriwarre bininj. <sup>16</sup> Yoh, ngaye ngadjalwernhwarreni duninjh, dja bonj, kundjalmekbekenh Christ Jesus

ngandjalmadbuni ngaye, dja nungka kunmak djalkurduyimi ngardduk. Kunmekbe kurduyimeng ba bu birribuyika bininj ngaye ngandinan bu wanjh ngandingunjedjikan, ba bu bedmanwali kabirriwoybukwon dja nungka kabenmarnbun bu kabirridarrkid munguyh munguyh.

**17** Mah, wanjh karriwarlahkenh bininj karriwokmarrkma nungka dja karriburluburlumen munguyh munguyh nungka nawu king duninh. Nungka nawu kadjalwohrnan yehyeng rowk djal munguyh munguyh, dja nungka minj karrowen dja kadjaldarrkid munguyh. Minj nangale bininj kabidarrkidnan, dja nungka nadjalkudji nawu God duninh. Wanjh karridjalburlumen! Amen.

*Ngaye Won Maninjmanu Kunwok Bu Yirrurk-mirrikenh*

*1 Timothy 1:18-20*

**18** Timothy, ngudda nawu ngardduk wurdyaw, ngudda yiburrbun God ngunmarnemunkeweng kunwok manbu prophecies kore bininj bedberre bu nguddakah, bu wanjh ngundimulewani ke. Ngaye bolkkime wanjh yawoymarneyime kore bedda ngundiyingkihmulewam ba bu ngudda yiymerran yiman kayime namak soldier nuye God. **19** Mah, wanjh yidjalwernhwoybukwo munguyh kore Christ Jesuskenh. Yuwn bu yiburrbun kore kunwarrekenh. Yiburrbun bu yikahwi birribuyika bininj birriwokwirihmeng God dja kunu birriwarreworrinj ba bu minj kabirridjalwoybukwon kore nungka. **20** Bu kuhni wanjh benbenemarnekurduyimerranj bininj bokenh nawu kabenengeyyo nawu Hymenaeus dja

mak nawu Alexander. Ngaye wanjh ngaben-benekurrmeng kore nawu Namarnde Duninjh ngabidkenwong. Ngaye ngadjare nahni bokenh bininj kabeneborlhme bu minj kabeneyawoyh-wokdi kunwok kunwarre nuye God.

## 2

*Bu Ngurrudi Yiwarrudjkenh*  
*1 Timothy 2:1-7*

<sup>1</sup> Kuhni wanjh ngahdjare ngarrokmihwe werrk. Ngaye ngadjare ngudda yibenmarnbun birriwern bininj bu kabirridi yiwarrudj dja birridjawa God nawu yehyengkenh rowk. Bindimarnedin yiwarrudj bedberre birribuyika bininj dja mak birrimanjbu God bu kunwern kahkurduyimerran. <sup>2</sup> Bindimarnedin yiwarrudj nawu bininj birrikihkimuk nawu yiman kayime kings dja mak nawu kabirriwohrnawohrnau. Ngurrbenmarnedin ba bu kunukka wanjh karrini kunmak, dja mak karrini kunmodmikenh rowk. Wanjh kunukka yiman kayime kunmak bu karridjaldi yiwarrudj nuye God dja mak karridjarrkni kore nungka yiman kunmakmak kabebke kadberre. <sup>3</sup> Kuninkunu rowk wanjh kundjalmak, dja God nawu kanngehke wanjh kadjare bu karrikurduyime. <sup>4</sup> Nungka wanjh kadjare bu kabenngehke birriwarlahkenh bininj, dja mak kadjare kabirriborlhme kore kunwoybukkenh.

<sup>5-6</sup> Ngaye wanjh kuninkunu ngadjalyolyolme bu God nakka nadjalkudji, bu minj nangale mak nabuyika God. Dja nungka nadjalkudji

wanjh nawu God kadberre. Jesus Christ nungka wanjh nadjalkudji nawu kanmarnewokdi kadberre kore God. Kaluk nungka nawu nadjalkudji djal bininj duninhkadberre nawu kangeeyo Christ Jesus, nawu kanmarnekanjkurrmerrinj kadberre rowk. Wanjh kunmekbekenh kunu God minj kanbuyinj kadberre. Kuninkunu wanjh nungan God dungnameng kore karremarnbuyindanj dja wanjh bolkkime karriwarlahkenh bininj wanjh karriwernhburr bun bu kunmak kurduyimerranj kadberre.

<sup>7</sup> Kuninkunukenh God nungka ngankurrmeng bu ngarrurrkmirri, dja nganmarnbom nuye apostle, bu nganmunkeweng bu birriwern ngabenmarneyime nuye kunwok. Ngaye ngahyime kunwoybuk. Ngaye minj ngahkurren kuninkunu bu ngahyime. Yoh, dja nungka wanjh ngaye nganmunkeweng bu ngabenmarneyime bininj nawu minj Jews bu kabirriburr bun kunwoybuk dja kabirriwoybukwon nungka nadjalkudji.

*Mankarre Bedberre Daluhdaluk Dja Binihbininj Kore Yiwarrudj*

*1 Timothy 2:8-15*

<sup>8</sup> Wanjh ngaye ngadjare birriwern binihbininj kore kubolkwarlahkenh bu kabirridjalbidwayhmen kaddum bu kabirridi yiwarrudj. Nawu bininj nungka God nuye wanjh nakka nanu birriwernhkukmarnburrimen bu kabirridi kore kunrayek nuye. Dja kunukka minj kunmak bu yiman kabirridangwerren dja mak kabirrihduren.

<sup>9</sup> Dja ngaye ngadjare daluk rowk nawu yiman kayime morlehmorlenj bu wanjh birriwernhkukmarnburren bulkkidj duninh. Kaluk minj ngaye ngadjare nawu yiman kayime kunmadj kabirribayahme kore nawern money. Dja mak minj ngaye ngadjare daluhdaluk kabirrikukmarnmarnburren kunmak dja kabirrinamerren nawu gold dja mak pearls dja mak kabirringabekmarnmarnburren bu kabirrikukbuyibuyikahworren. <sup>10</sup> Dja wanjh kunukka burrkyak. Ngaye wanjh ngadjare bu kabirridjalkurduyime kunmak bu bedberre birribuyika. Kunukka wanjh kundjalkarremak duninh ngalbu daluk kadjare kakurduyime bu yiman kahdi yiwarrudj dja kabiwokmarrkmang ngarre God.

<sup>11</sup> Dja ngalbu daluk ngalka wanjh birriborlhamen bu yeledj kabirrikurduyime, dja minj mak kabirribalkimukworren bedberre birribuyika.

<sup>12</sup> Ngaye minj ngadjare daluk bu kabindibukkabukkan binihbininj. Dja bedda minj kabindimarnewohrnan nawu yiman binihbininj. Dja daluk wanjh birridjalngurdmen bu kunmekbe. <sup>13</sup> Bu kuninkunu wanjh yiburru kore nawu Adam werrk dokmeng bimarnbom God. Yerreh wanjh bimarnbom ngalbu daluk ngeyyoy Eve. [Genesis 2:7; 21-22] <sup>14</sup> Wanjh Namarde Duninh bikoweng ngalbu daluk dja nungka nawu Adam nawid. Dja ngaleng wanjh Eve bakkeng mankarre nuye God. [Genesis 3:1-6] <sup>15</sup> Kunu bonj, bu daluhdaluk kabirridjalwoybukwon, dja mak kabindimarnedjare birribuyika, dja

mak bu kabirridjalkurduyime kunmak,  
 bu minj kabirriburlumerren, wanjh  
 nungan God munguyh kabendjalngehke  
 dja kabenbidyikarrme kore wurdyaw  
 kabindihyawmang.

### 3

*Bininj Nawu Kabirriwohrnan Kore Yiwarrudj*  
*1 Timothy 3:1-7*

<sup>1</sup> Kanbekka bu kunwoybuk marneyime. Ngudda yiburrbun bininj yika kabirrihyime, “Nawu nangale kadjare karrokmikerren kore kawohrnan yiwarrudjkenh, wanjh bonj kunukka kunmak.”\*. Wanjh kuninkunu kabirriyime bu kore kundjalwoybuk kunwok kahyo.

<sup>2</sup> Nawu nangale yimankek kadjare kahdurrmirri bu kawohrnan manbu yiwarrudj, namekbe nanu wanjh bininj nadjalmaknin munguyh bu kunmak kahkurduyime. Mak bikarrmen ngaldjalkudjinin ngalbininkobeng nuye. Nungka marnburrimen bu kore kunmak kadjalkurduyime dja mak kaburrbun kore kunmak yalyal kakurduyime. Dja mak mandjadnin bu kakurduyime kore kabennahnhan birribuyika bininj, dja mak kabenkimang nawu bininj kubolkbubuyikabeh. Nungka wanjh nadjalmaknin bu kabebukkabukkan kore kabenbidyikarrme birribuyika bininj. <sup>3</sup> Yuwn bu mak kabongun kunwern kunbang. Yuwn bu mak kunwarre kabenmarnekurduyime bu

---

\* <sup>3:1</sup> Dja kunbuyika kabimbuyindi, “Nawu nangale kadjare kayimerran bishop.”

kabendumg nawu birribuyika bininj, dja kabemarnekurduyime birriwern bu kunmodmikenh dorrengh. Dja mak yuwn bu nawu bininj yiman kayime kabendangwe munguyh kabenhmarneyidngalke, dja yuwn bu mak kamanjngun kunwardde nawu money.

**4-5** Nahni bininj wanjh bennahna nawu nungka nuye namud. Kaluk kabemarnbun nawu wurdwurd nuye nakka kabirriwokmarrkmang dja kabirriwokbekkan kore kabenhmarneyime bedberre. Dja bininj nawu minj kabewernhnahanan nuye namud wernkih duninh, yiddok kabennahninan bininj kore God nuye yiwarrudj?

**6** Yuwn bu nakka nakerrnge bu karredjingmang kabimunkekadjung Jesus bu kundeddjumbungkenh. Nanu wanjh minj kayimerran bu kawohrnan njalenjale kore manbu yiwarrudjkenh. Wardi kunubewu wanjh kahburluburlumerren. Kunu wanjh kawarreworren nungandeleng dja kayimerran yiman Namarnde Duninh namekbe nawu God bidjadmeng bu burluhburlumerreni.

**7** Dja kunbuyika warridj, nanih bininj wanjh ngeymaknin, bu birribuyika bininj nawu kuberrk kabirridi, wanjh bedda kabirimakwan, ba bu minj Namarnde Duninh kabikukwarrhke kore kunwarre kahyime, dja kawowarreworren.

*Bininj Nawu Kabirriyimerran Nawu Deacons  
1 Timothy 3:8-13*

**8** Dja mak nawu nabuyika yiman deacons wanjh nakka nanu kundjalmekbe kadjalrohrok. Wanjh nakka nanu kundjalmekbe yerreh djalkurduyimen bu djal mandjad, dja yuwn

bu kawohkurrekurren. Dja yuhn bu mak kabongun kunbang bu kamayahme. Dja mak bu kamanjngun njalenjale nawu yiman kayime kadjirdmang kunwardde money bedberre.<sup>9</sup> Nakka nanu wanh Kawernhkarrme manbu mankarremak, kore kabirriwoybukwon God. Dja yuhn bu mak kawohburrbun kore kunwarrekenh.

<sup>10</sup> Yibenkurduna yibenrohrokmen werrk naninjnanu nawu bininj kabirridjare deacons kabirriyimerran. Bu yibennan kunmekbe kabirrikurduyime kore kunmak rowk, wanh kunu yibenkurrme kore kabindimarnedurrk-mirrikenh bu kabirriyimerran deacons.

<sup>11</sup> Bu nahni bininj kabikarrme ngalbininkjokbeng, wanh yirohrokmen warridj. Wanh kunmekbe rowk kadjalkarreyime kakarrerohrok rowk bu kayimerran ngalengngarre. Wanh kunmekbe djalkurduyimen ngalmekbe daluk kore mandjad duninjh. Bu minj kabebalyolyolme nawu birribuyika daluk dja bininj. Dja djalmarnburrimen bu kundjalmak kadjalkurduyime munguyh. Dja mak munguyh kadjalkurduyime kore kawokkurrmerren.

<sup>12</sup> Nawu nangale kadjare kayimerran deacon, wanh nakka nanu bidjalkarrmen ngaldjalkudjin ngalbininkjokbeng nuye. Dja mak bendjalnahna wurdwurd nuye rowk. Dja mak nawu namud nuye bu kunmak rowk kabennahnhan.

<sup>13</sup> Nawu nangale karrurkmirri kunmak rowk bu yiman deacon kayime, wanh birriwern bininj nawu kabirrinan kabirrimarnewarnmakmen

nuye. Wanjh kunukka namekbe bininj kamurrngrayekmen bu kore kabenmarneyolyolme birriwern bininj bu kabiyolyolme Christ Jesus.

*Bu God Nuye Kunwok Manbu Kahwarlkayindi*

*1 Timothy 3:14-16*

**14-15** Kaluk ngaye wanjh ngadjare ngambadre kore ngudda. Dja bolkkime ngaye ngayingkihbimbun ngudberre mahni kunwok bu bengdayhke ngudberre. Dja bu yiman minj ngamre bu kunkuyeng, wanjh kunukka yingan yibimnan nahni djurra, dja yiburrbun manbu baleh bininj kabirrikurduyime kore nawu namud nuye God. Ngaye ngabenyo yolyolme bininj nawu yi-warrudj bedberre. Kaluk God nawu kahd-jalmimbi munguyh wanjh kabenkarrme nuye bininj, nawu bedda kabirrikarrme manbu kuno-woybuk kunwok manbu mandulmuk duninhkadberre karriwarlahkenh bininj rowk.

**16** Yoh, wanjh kuninkunu kundjalwoybuk duninh. Kuhni bu kawarkkawarlkkayindi mankarre manbu kayolyolme bu karriwoybuk-won God. Wanjh kunukka mandjalkarrekuken duninh. Dja yiburrbun mahni kunwok manbu kayime, “Nungka wanjh kumwam kunburrk dorreng bu yimerranj ngad bininj duninh, wanjh birridjalwern bininj birrinang nungka rowk. Nawu Namalngmakkaykenh benbukkang nawu birrinang bu woybukkih duninh nungka God. Dja mak nawu Angels warridj nakka

birrinang. Kaluk bininj birriwam kore kubolk-warlahkenh rowk dja bindimarneyolyolmi bininj nawu minj Jews. Dja birridjalwern bininj kondah kurorre wanjh birriwoybukwong nuye. Dja God bikang kaddum birrurndiweng kore nungandeleng nuye.”

## 4

*Yikahwi Bininj Kabindibukkan Manbu Kaben-warrewon Bininj*  
*1 Timothy 4:1-6*

<sup>1</sup> Nawu Namalngmakkaykenh kandjalmarney-imeng kurobbe kore mandjad duninh, kaluk bu yerrekah kuninkunu kunred darnkih kabalyakmen, wanjh yikahwi bininj nawu yi-warrudj bedberre wanjh kabirrimayaliborledme kore kabirriwoybukwon. Dja wanjh bedda kabirribekkan nawu nawarre kunmaing nawu kahkurren, dja mak namarnde nawu kabenn-bukkabukkan kore kunwarre. <sup>2</sup> Yoh, yikahwi bininj kabindibalbukkan birribuyika bininj kore kunmekbe kunwarrekenh. Birrimekbe bininj nakka wanjh yiman kabirridjalkurren, bu kabirridjalwohkurrekkurren yimankek bedda nawu yiwarrudj bedberre. Kaluk kunmayali bedberre wanjh mayaliwarreminj duninh dja wanjh minj kabirriyawoyhburrbun bu kunmakkenh. <sup>3</sup> Nahni kabirrikurrehkurren bininj kabirriyime, “Ngudda minj ngurrimarren!” Dja mak kabirriyime, “Yuwn bu ngurringun yikahwi maninjmanu manme.” Dja med, God marnbom manbu manme bu karringunkenh, dja bu ngad

karriwoybukwon wanjh karridjalburrbu kore kunwoybuk ba bu ngad karrimanjbunkenh bu karringun. <sup>4</sup> Nawu yehyeng rowk God marnbom nakka wanjh namak rowk. Dja ngurridin yi-warrudj, ba bu ngurringunkenh bu kamak rowk. <sup>5</sup> God yimeng nahni nakka namak, dja bu ngudda ngurridi yiwarrudj ngurrimanjbun God, wanjh nungka kayime kunukka kamak bu ngurringun.

<sup>6</sup> Mah, ngudda Timothy wanjh yibenmarney-imen nawu bininj yiwarrudj bedberre mahni manbu kunmayali rowk makka wanjh kore ngayebeh. Bu kuhni yibenbukkabukkan, wanjh kuninkunu yibendjalbukka, wanjh kunukka ngudda kunmak yidjaldurrkmirri nuye nawu Christ Jesus. Ngudda korroko yidjalmur-rngrayekminj bu yibekkang kunwok kunmak kore ngundibukkan, wanjh yiwoybukwong kore nungka wanjh kunmekbekenh kunu ngudda yid-jalwoybukwon maninjmanu kunwok.

*Bu Ngudda Ngurrimarnedurrkmirri Christ Jesus Bu Kamak Rowk  
1 Timothy 4:7-11*

<sup>7</sup> Yuwn kab yibekkan kunwok manbu kabirri-malelmarren, dja mak kunmayali manbu minj kamdolkkan kore Godbeh. Dja mak yuwn bu yibenbekkan nawu birriwarre bininj kore kabirriyime, dja ngaleng yingan yidjalbukkarrimen kore yikurduyime bu yidjalmunkekadjung dja yihdjalwoybukwon nawu God.

<sup>8</sup> Ngudda yiburrbun nawu yikahwi bininj nawu kabirrimurrngrayekworren ba bu kabirrikukmarnburren nawu kunburrk bedberre,

wanjh kunukka wurd kamak, dja bu mak kabirrimurrngrayekworren kore kabirrimunkekadjung nawu God, wanjh kunukka kundjalmak kore kundarrkid wanjh kaluk yerrekah kunu kabirribaldarrkiddi kore God.

**9-10** Bolkkime ngaye ngadjare marneyime ngudda kore kunwoybuk ba bu yiwoybukwon dja ngad wanjh karridurrkmirri kore kunrayek duninh bu karridjalrohrokme kore kadjalkudjiwi munguyh. Ngad wanjh karridjalwoybukwon God nawu woybukkih duninh kadjaldarrikid munguyh, nawu nungka kabenngehke bininj rowk. Kaluk ngaye kunu ngabenyo yolyolme bininj nawu kabirriwoybukwon nuye.

**11** Yibenmarneyimen birriwern bininj kore mandjad ba bu kabirriwokmarrkmang manbu maninjmanu kunwok, kunmekbe bedda yibendjalbukkabukka bu munguyh.

*Paul Bibengdayhkeng Timothy Kore Karrurkmirrikenh*

*1 Timothy 4:12-16*

**12** Bu ngudda yirrurrkmirri manbu yiwarrudj ngarre, yuwn yibenbekkan bininj nawu kabirriyime ke bu ngudda ngundiyawurrinjwan. Yuwn yibenburrbun, dja yidjalwokdin kore mandjad duninh, yidjalkurduyimen kunmak, yibenmarnedjarenin birribuyika bininj, dja mak yidjalwoybukwo God munguyh. Yuwn bu yibalkurduyime kore kunwarre. Kab yidjalkurduyimen kore kunmak yinin ba bu bininj nawu yiwarrudj bedberre wanjh kunu ngundidjalngunjdjikan.

**13** Kaluk ngaye ngamre yerrekah kore ngudda. Dja bolkkime med, yidjaldurrkmirrin, dja yibimngeybu djurra nawu Bible bedberre kore kurobbe bu ngurrimirnderri kore yiwarrudj. Dja mak yiweyka bedberre bu yiyyolyolme ba bu mandjad yibenbukkabukkan.

**14** God korroko ngunwong ngudberre kuhni kundjalmak duninjh, bu nungka ngunmarn-bom yibenmarnewohnnan bininj. Bu bininj nawu kabirriwohrnawohnnan birrimirndemorn-namerrinj wanjh kunu ngundimarnebidkur-merrinj kore kukodj ke bu ngundikodjkar-meng, dja God benwong prophecy manbu kun-wok bu nguddahkenh. God ngunwong mahni djalburudjang bu yirrurrrkmirrikenh. Mah, wanjh yidjaldurrkmirrin! **15** Kab yidjaldurrkmirrin munguyh kore mahni manbu yikarrme, dja wernkih yirohrokmen, ba bu birribuyika bininj ngundinan bu ngudda yidjalmurrngrayekmen. **16** Kab yidjalnahnarrimen bu minj kunwarre yikurduyime, dja mak kore kunwok yihweykan wanjh djal mandjadnin. Wanjh kuninkunu yid-jalkurduyimen munguyh ba bu kunukka wanjh yingehkerren, dja mak yibenngehke bininj nawu ngundihbekkan.

## 5

### *Yibenmarnewokdin Bininj Kore Mandjad 1 Timothy 5:1-2*

**1** Bu ngudda yibenmarnewokdi nawu bininj yiwarrudj bedberre, wanjh yuwn bu kunrayek kunwok yibenmarnewokdi bedberre binihbininj

nawu kohbakohbanj. Dja yibenmarnewokdin yiman kayime kohkornkumo ke. Dja nawu yahyawurrinj wanjh yibenmarnewokdin yiman kayime ngurridangerrinj yerreh. <sup>2</sup> Dja mор-ле-мо-рен-ј nawu kohbakohbanj wanjh yibenmarnewokdin bedberre yiman kayime yerreh nга-ль-ба-да-јан ke. Dja daluhdaluk nawu birribalngudjmakmak, wanjh nakka yibenmarnewokdin yiman kayime yerreh ngurridangerrinj. Yuwn mak bu yiborrkbun bedberre.

*Ngaye Ngabenyolyolme Kohbakohbanj Daluk  
Ngalbu Birrikamarrdjukun*

*1 Timothy 5:3-10*

<sup>3-4</sup> Ngalgale daluk ngalbu ngalkamarrdjukun, kaluk minj nangale ngalbu kabinahnan, wanjh kunmak yidjalmarnekurduyimen. Dja bu yiman kakarrme wurdyaw nawu ngarreki, dja nawu benyawdjumdoj, wanjh bedmanwali birrinahna yiman bu ngaleng yimi bennahnani bu birrihwurdayawni. Dja yuwn bu bedda djal kunwokwi kore yiwarrudj. Nawu God kadjare kabirrinahnarren nawu bedman birrimud deleng. Bu kumekbe kabirrikurduyime, wanjh kunu nungka God kanjilngmak duninh bedberre. <sup>5</sup> Mak yikahwi daluhdaluk kamarrdjukun ngalu minj nangale kabinahnan bu kabibidyikarrme wanjh kabidjalmbun nawu God, dja mak kabidjalwoybukwon nungka dja munguyh kabidjal-marnedi yiwarrudj benbekad dja kukak. <sup>6</sup> Dja yikahwi kamarrdjukun nawu daluhdaluk wanjh nakka bedman kabirridjaldjare kore kabirrikurduyime ba bu bedman kabirridjalmilngmarn-

burrenkenh. Kaluk bedda kunu wanjh yiman birrimalngdoweng rerrih.

<sup>7</sup> Kuninkunu rowk wanjh yibengdayhke-men ba bu minj kunwarre kabirribalkurduyime.  
<sup>8</sup> Nawu bininj minj kabennahnan nuye birrimud nawu kabirriyo kore nuye kunrurrk, wanjh nakka nanu yiman kayime kabawon yiwarrudj. Dja kadjalwernhwarremen bu yiman kayime birribuyika bininj nawu minj kabirriwoybuk-won God.

<sup>9-10</sup> Ngudda yibendjalnahnan nawu kamahkamarrdjukun duninh. Kaluk birringalengale? Nawu birridjalwernhkohbanj duninh nakka wanjh minj nabininjkobeng kabirriyawoyhmang. Dja yimankek birribuyika bininj kabindimakwan. Dja ngokko bedda bindidjordmiweng wurdwurd bedberre, dja mak bindikimangi nawu birriwokbuyikani, dja mak bindinahnani bininj nawu yiwarrudj bedberre, dja mak bindibidyikarrmeng bu kunyid kumbebmeng bedberre, wanjh munguyh birridjalkurduyimi bu bindinahnani kore birribuyika bininj. Wanjh birrimekbe nawu morlehmorlenj kamahkamarrdjukun, yibenneynamenamen birringeydin kore djurra ba bu ngurrbenbidyikarrme.

*Ngabenyo yolme Ngalbu Birribalngudjmak  
Kamahkamarrdjukun  
1 Timothy 5:11-16*

<sup>11-12</sup> Bolkkime ngaye wanjh ngadjare ngahy-ime nawu daluhdaluk birribalngudjmakmak

kamahkamarrdjukun. Yuwn bu yibenngey-name kore djurra. Bu yingeystame ngalkudji kore djurra wanjh wardi kawokkurrmerren bu kayime, “Ngaye ngahdjaldurrkmirri nuye nawu Christ.” Kaluk rerrekah wanjh kunukka bininj kabimang bu kabenemarren. Wanjh manmekbe manbu kunwok kore wokkurmerrinj wanjh kabakke manbu mankarre. Wanjh kunukka kunwarre. Dja bonj, kuhni wanjh yuwn yibenngeykurrme nawu kamahkamarrdjukun kunngey kabirringeydi nawu birringudjmak daluk. <sup>13</sup> Nawu birringudjmakmak kamahkamarrdjukun daluhdaluk nakka bu minj kabirridurkmirri, wanjh kunukka kabirridjalngudjwarremulewarren munguyh. Kabirridedjingmang bu kabindiyolyolme birribuyika dja kabirrire kore kunrurrk manwern dja kabindimarneyime kunwarre, dja mak kabirriyolyolme nawu njalehnjale nawu minj kunmak. <sup>14</sup> Wanjh kunmekbekenh kunu ngaye ngahyime nawu birringudjmakmak kamahkamarrdjukun wanjh nakka nanu birrimarri men nawu bininj ba bu kabirrimang wanjh wurdyaw kabindinan-nan. Dja bu burrkyak, wanjh kunubewu Namarnde Duninh nawu kanwidnan rowk wanjh kabenmarnbun bininj bu kandiyolyolme kadberre. <sup>15</sup> Yikahwi daluhdaluk ngokko wanjh birriborledkerrinj dja birrimunkekadjuy nawu Namarnde Duninh.

<sup>16</sup> Kunubewu yikahwi daluhdaluk nawu yiwarrudj bedberre kabirridjarrkyo nawu kamahkamarrdjukun, bindinahna bedmandeleng dja nawu yiwarrudj bininj nakka minj kabindi-

nahnan birrimekbe daluhdaluk. Bininj nawu yiwarrudj bedberre kabindinahnан birribuyika nawu kamahkamarrdjukun nawu minj nangale nabuyika kabenbidyikarrme.

*Ngaye Ngabenyolyolme Bininj Nawu Yiwarrudj  
Kabirriwohrnawohrnан  
1 Timothy 5:17-21*

<sup>17</sup> Ngudda wanjh yibenbenwokrayekwon bininj nawu yiwarrudj bedberre bu kabindikarremulewan bininj nawu kabirriwohrnan kore yiwarrudjkenh, dja bedda kunmakkenh kabirriwernhdurrkmirri. Dja mak yibenmarneyimen bu bindiburlumen nawu birrimak bininj kabirriweykan dja kabindibukkabukkan God nuye kunwok. <sup>18</sup> Yiburru kore Bible djurra kahyime, “Bu bulikki kamimmelhmelme manme manbu wheat, ba bu kamimyarlarrmerren, wanjh yikahwi ngurribawo kangun. Yuwn bu ngurridabke.” [Deuteronomy 25:4] Dja mak kabimbuyindi kore kahyime, “Wanjh kunmekbe ngayime bu bininj nawu karrurrkmirri ngudberre wanjh nakka nanu ngurrikarremulewa.” [Luke 10:7]

<sup>19</sup> Bu nangale bininj kahyime, “Nahni bininj nawu kawohrnan kore yiwarrudjkenh, wanjh ngaburrbun bu kunwarre kurduyimeng!” Wanjh yuwn kab yiwoybukwon manmekbe mankarre nawu nakudji ngunmarneyime, dja yidjalbawo. Dja ngaleng benebokenh dja nuk birridanjbik bininj bu kabirrimre ngundimarneyime bu kunmekbe kundjalkudjiwi kunwok, wanjh kunukka kunu yiwoybukwo manmekbe kunwok. <sup>20</sup> Bu woybukkih namekbe bininj nawu yiwarrudj

kawohrnan kurduyimeng kunwarre, yidjaldung kore kumirrk kurobbe ba bu birriwern kabirribekkan dja bedmanwali kabirrikelemen yiman kunmekbe kabirrihkurdyime.

**21** Kuninkunu wanjh ngaye bu marneyime rowk. God dja nawu Christ Jesus wanjh kandihnan bolkkime dja mak angels nawu God bendjalmey. Wanjh ngaye bengdayhke kuninkunu ngayimeng ke. Kunmekbe ngadjalkurdyime ke kore ngaye marneyimeng. Dja yuwn mak yibenbalmarnekurdyime birribuyika bininj kunwarre, dja yibendjarrknahna rowk bininj nawu yiwarrudj bedberre. Ngayime bedda wanjh birriraworrinj yikahwi nawu birrikuken, yikahwi nawu birrimarladj, nawu birrikihkimuk dja nawu kabirridjaldi. Bonj, yibendjalnahna bu yiman kabirrirohrok.

*Yibekka Kuninkunu Kunmayali Ngudda Ke  
1 Timothy 5:22-25*

**22** Bu ngudda yibalburr bun bu baleh yarrkka kore bininj nawu kayimerran yiman kawohrnan yiwarrudj ngarre, wanjh kunukka yeledj yidjamarn bun nahni bininj. Yuwn mak yibangmebidkurrmerren bu werrkwerrk nuye, dja med yimadbu, yuwn bu yibangmekukmurrmiwerren.

Dja yuwn bu mak ngurri raworren nawu bininj birriwarre. Yidjalnahnarrimen ba bu yidjalkurdyimen kore God nuye.

**23** Ngaye ngaburr bun bu ngudda yirroweni kunwernkah, dja kunukka bonj kamak dja

walakkih yibongu manbu wine ba bu ngunnjam-marnbun. Dja yuwn mak yidjalbongun manbu kukkuwi.

<sup>24</sup> Yikahwi bininj nawu kabirrikurduyime kore kunwarre, wanjh birriwern bininj kabirriburr bun kore kabindihnan bu kabirrihkurduyime. Kaluk bu kabindidjadmekenh, wanjh kunukka minj ngad karrikangebarrhme. Dja birribuyika bininj nawu kabirriyime kunwarre, kaluk minj nangale kabennan. Wanjh bu yerrekah kore kabindidjadmekenh, wanjh karridjalwern karri-nan bu kunmekbe birrihkurduyimi. <sup>25</sup> Wanjh kunmekbe kadjalrohrok bu kunmakkenh. Bininj birriwern ngundinan kore ngudda yihkurduyime kunmakmak dorreng. Yika bininj minj kabirriburr bun bu kore ngudda yihkurduyime kunmakmak. Kaluk yerrekah, wanjh birriwern ngundinan kore ngudda yikurduyimi kore kund-jalmakni.

## 6

*Bu Bininj Nawu Slaves Kabirriwoybukwon Jesus*

*1 Timothy 6:1-2*

<sup>1</sup> Ngaye ngadjare yibenmarneyime bininj nawu yiman kabirrihbongdi bu kabirrihdur-rkmirri kunrayek nawu nuye nakudji bininj. Kunukka wanjh kunmak bu yiman kabirridjal-wokmarrkmang bininj nawu kawohrnan bed-berre, dja birridjalkurduyimen ba bu birriwern bininj kabirriyime kunmak nuye God dja minj kandikewkme kore ngundihbukkan kore yiwarrudj. <sup>2</sup> Yiddok namekbe bininj nawu

kabenmarnewohrnan nawu slaves nungka warridj kabiwoybukwon Jesus? Wanjh bininj nawu kabirrimarnedurrkmirri yiman slaves, bu bedda kabirriwoybukwon Jesus, wanjh yuwn bu bedmandeleng kabirrimarneyime, “Dja ngaleng nuk karridangerinj dja minj mak ngundi-marnedurrkmirri.” Yuwn bu kuhni kabirriyime. Dja birriburru nahni nawu kawohrnan bedberre kabihwoybukwon God warridj, dja wanjh kabirrimarnedjaremen. Dja ngaleng kunu kabirrimarnedurrkmirri bu kunmak. Wanjh kuhni rowk yibendjalwern-hbukkabukkan manbu ngaye marneyimeng, bu yibenbengyolyolmen ba kabirriwokmarrkmang.

*Yikahwi Bininj Kabirridjarewern Nawu Kunwardde Money*

*1 Timothy 6:3-10*

<sup>3</sup> Kunubewu yikahwi bininj wanjh kabindibalbukkan kunbubuyika kunmayali. Bedda wanjh kabirrihbekkan kunmakmak kamhbebmerren kunmayali nuye Jesus Christ nawu kawohrnan kadberre, dja bedda kabirribalwokwarrewe nuye. Wanjh birrimekbe bininj minj mandjad kabirriwernhbekkan kore kunmayali nuye God.

<sup>4</sup> Bininj nawu kabirrikurduyime wanjh kabirrimarnburren bedmandeleng bu kabirrihkumuk-worren. Bedda minj njale kabirrimenmenbekkan. Bedda wanjh kabirridjaldjare kabirrihdangwerren munguyh. Kunubewu kabirridjare kabirriburren bu mankarrekudjikenh kore kahkarremenmenyime. Kunukka yiman kabennarbun bininj bu kabirrikirnwerren bu kabirrihbebbehmarneyimerren munguyh. Bu bedda

minj kabirriwoybukworren bu bininj dja kabirriwokmarrkmarren dja kunukka kundjalwarre bu kabirrihwokkodjkenhmarren. <sup>5</sup> Bu naninjanu bininj wanjh kabirridjalburrbun kunwarrehwarre kore kunmayali dja kabirrihburr bun kore kunkodjkulu bedberre. Dja bedda minj kabirriburrbun kore kunwoybuk. Wanjh bedda munguyh kabirridjalwarreworren bu kabirriyime bu kabirrihmarnedurrkmirri nuye God ba bu kabirridjalkukenmen!

<sup>6</sup> Wanjh kanbekka, bu ngudda yidjalwoybukwon munguyh nuye God, wanjh kunukka yiman kayime ngudda yikarrmen nawern namakmak. Ngayime yibekkarren bu ngudda yikarrme kunmodmikenh kamak yikukmononmang.

<sup>7</sup> Kuhni wanjh bu ngaye kanhmayalimidjbun bu ngahyime, ngad bininj wanjh minj njale karrimkayinj bu kondanjunu kurorre, bu kore karriyirranginj. Ngad minj njale mak karrikan bu karribawon kondanjunu kore kurorrebeh.

<sup>8</sup> Bu yiman kayime ngad karringun manme dja mak karrikarrme kunmadj bu karridjohdjongbuyindi, nakka wanjh yiman kayime kamak bu karrikarrme waken. <sup>9</sup> Bininj nawu kabirridjare bu kabirrikarrme yehyeng nawern money bu kabirrikukenworren, nakka wanjh yiman kayime kabirridjalwernhwarremen bu minj njale kabirriburrbun kore kunmak ngarre. Bedda yiman kabirriwarreworren dja wanjh kabirridjalmalngdowe. <sup>10</sup> Nawu nangale bininj bu kamanjngun yiman kunwardde nawu money, nakka wanjh namekbe bininj karredjingmang kunwern kunwarre kakurduyime. Yikahwi bin-

inj nawu yiwarrudj bedberre birrimanjnguni money, dja birribawong kore kunwoybuk nuye God kore birrimunkekadjungi. Wanjh kunu birrimarnburrij bu birrimayahmi bedmandeleng dja birriwernhnjilngwarreworrinj.

*Bu Ngaye Wokrayekwon Ngudda*  
*1 Timothy 6:11-16*

<sup>11</sup> Timothy, ngudda nawu God nuye bininj, dja yidjalbawo rowk kunmekbe kunwarre. Dja ngaleng yidjalkadju kunmak munguyh. Yidjal-munkekadju God nuye, dja yidjalwoybukwon bu munguyh. Dja mak yibendjalmarnedjarenin birribuyika bininj. Yuwn bu yiwarnyakmule-warren bu kuhni rowk yikurduyime. Dja mak yeledj yibenmarneyime birribuyika bininj yibennahnhan. <sup>12</sup> Ngudda yiwoybukwong God nuye, dja munguyh yidjalkukyiburrimen nuye. Wanjh kunukka God ngunmarnbun nungan bu yidjaldarrkid munguyh. Dja yuwn bu mak yibawon kore God ngunkayhmeng ba bu ngunmarnbun yidjalmalngmimbi munguyh. Kuhni yiyimeng kore birribekkang birriwern bininj bu yimulehmulewarrinj. Wanjh kuhni yidjalwernhkarrmen.

<sup>13</sup> Dja ngaye wanjh ngakurrme mandjad mankarre ngudda ke. God marnbom yehyeng nawu darrkid dja nungka wanjh kanbekkan bolkkime. Dja mak Jesus Christ nawu bimarnemulewarrinj Pontius Pilate ba bu nungka birriburrbom birriwarlahkenh nawu bininj. <sup>14</sup> Ngaye wanjh marneyime ngudda mandjad. Dja yuwn bu yibakke manu mankarre.

Dja yidjalkurduyimen mandjad duninh munguyh kaluk yerrekah God kabimdurndiwe Jesus Christ nawu kawohrnan rowk kadberre.

**15** God wanjh kuhni kakurduyime kore nungan kadjare karrungname. Bu nungka wanjh nawu nadjalwernhmakkaykenh. Nungka wanjh nadjalkudji nawu kawohrnan kubolkwarlahkenh rowk. Nungka nawu king kabenyurrhke binihbininj nawu kings. Dja mak nungka nadjalkudji nadjalkimuk duninh nawu kabemarnewohrnan bininj nawu kabindihmarnewohrnan birribuyika bininj. **16** Nungka wanjh nadjalkudji nawu minj karrownen. Dja mak minj nangale bininj bikuknayinj kore kahni. Ngad minj karridarndi nuye bu karrinan kore kahni, dja kunmakmak duninh nuye kore kawarlkkayindi wanjh yiman kabiwakbuyingun. Dja karriwarlahkenh wanjh karridalwoybukwo bu karridi yiwarudj nuye. Ngad wanjh karridjare nungka kawohrnan rowk kundulkarre dorrengh bu munguyh munguyh. Amen.

*Yibengengdayhkemen Nawu Birrikuken Bininj  
1 Timothy 6:17-19*

**17** Ngaye wanjh ngadjare ngabenyo yolme bininj nawu yiwarudj bedberre nawu kahirrikarrme nawern namakmak kore kondanjkunu kurorrebeh. Kunubewu yikahwi kahirriburlumerren bu yimankek kahirriyime, “Ngaye ngahkarrme nawern money nawu ngaye nganngehke.” Kunu kunwarre. Bonj, dja kunubewu kahirrikukbalanhmang manbu money bedberre dja wardi kadjalyakmen. Yoh,

ngudda yibenwokrayekwo bu kuninkunu kabirrihburr bun birringurdmen. Dja ngaleng birridjalburr bu nadjalkudji God dja birridjalwoybukwo munguyh. Bu nungka wanjh nadjalkudji nawu kanwon yehyeng rowk namakmak kadberre ba bu kore karridjalnjilngmak munguyh.

**18** Dja yibenmarneyimen birrimekbe bininj bindimarnedjalkurduyimen kunmak birribuyika bedberre bininj, dja bindikongibu bu yehyeng kabirriworren namakmak kore kabirihnjilngmarnburrenkenh munguyh.

**19** Bu kunmekbe yiman kabirrihkurdyime, wanjh kunukka yiman kabirrimang nawern namakmak kore kahyo heaven. Kaluk kore kubolkmak kaddum kabirridarrkid, wanjh kunukka kabirridjalnjilngmak munguyh. Wanjh kumekbe kabirrimang kore kundarrkid duninjh munguyh munguyh.

*Kuhni Kunkudji Ngadjare Marneyime Bu Ngay-  
iburnbunkenh*

**1 Timothy 6:20-21**

**20** Timothy ngadjare bu wanjh kandjalwern-hbekkan wernkih duninjh. Dja ngudda wanjh yimey nakuken nawu kahyo ke. Dja yidjalwernhnahna, dja yuwn bu yibenkadzung bininj nawu kabirrihdjalyolyolmerren bedberrekenh. Bedda yiman kabirrihdjaldangwerren bu bedda wanjh kabirriyime bu kabirriburr bun yimankek kunmayali God nuye. Dja burrkyak, bedda minj kabirriwernhburr bun kunwern kunmayali kore kunmakkenh kahyo. **21** Yikahwi bin-

inj birriburrbuni kuninkunu dja nakka wanjh  
birribarlanhmey mankarre nuye God bu minj  
birriwernhkarrmeninj kore birrihwoybukwoni.  
Bonj. Dja ngaye wanjh ngadjare kunmak ngund-  
jalmarneyime God nuye munguyh. Wanjh bonj,  
kumekbe ngangurdme.

**God Nuye Kunmok**  
**The Holy Bible in the Kunwijk language of Australia**  
copyright © 2018 Bible Society of Australia

Language: Kunwijk (Gunwinggu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-04-22

---

PDF generated using Haiola and XeLaTeX on 11 Nov 2022 from source files dated 19 Jul 2021

1e76c3c7-fc1a-5488-bdac-9a98d749a074